

47

Plaise à Nosseigneurs du Conseil  
auoir pour recommandé en  
Iustice le bon droit de

Frere Pierre Guisenet Religieux profex de l'Ordre de S.  
Benoist, Preuost de Thémolac, & Messire Henry de  
Refuge, Abbé de Saint Cybar, Conseiller au Par-  
lement de Paris, deffendeurs.

*CONTRE Louïs Machon, Charles de Merignac, Frere Iean le  
Turquier Religieux de l'Ordre de Clugny pretendans à ladite  
Preuosté, & Me Iean Roquette, cy-deuant pourueu d'icelle,  
demandeurs & deffendeurs.*

**E**T considerer que la contestation entre lesdites parties  
pour le possessoire dudit Benefice a esté d'abord portée  
au grand Conseil entre lesdits Merignac & le Turquier, que  
la cause y a esté contradictoirement retenuë, que ledit de  
Merignac y a procedé volontairement, qu'il y a fait assi-  
gner led. Roquette & Iean la Peyre, par lesquels il a cy-deuât  
esté poursuiuy au Parlement de Bordeaux, sous le pretexte  
neantmoins desquelles poursuittes ayant fait naistre vn con-  
flit de Iurisdiction entre ledit Parlement & ledit grand Con-  
seil, il se pouruût luy mesme en reglement de Iuges, & par  
vn premier Arrest de forclusion les parties furent renuoyées  
audit grand Conseil, mais ledit Merignac s'estant fait resti-  
tuer, par autre Arrest contradictoire du 24. Octobre 1662. les  
parties furent derechef renuoyées au grand Conseil.

Les raisons sur lesquelles interuint cét Arrest estoient en-  
tre autres que bien que Merignac eut volontairement proce-  
dé audit grand Conseil, il estoit neantmoins le seul qui vou-  
lust estre renuoyé au Parlement de Bordeaux, toutes les au-

tres parties demandant de proceder audit grand Conseil, d'ailleurs vne des parties pretendans audit Benefice estoit Religieux de l'Ordre de Clugny, il s'agissoit du recellement du corps du dernier titulaire, dont ledit Merignac a luy-mesme demandé de faire la preuue audit grand Conseil, & ledit Merignac auoit & a encore plus de parens qu'il n'en faut pour ne pouuoir plaider au Parlement de Bordeaux.

En execution de cét Arrest les parties ont plaidé volontai-  
rement au grand Conseil pendant huit mois, apres les-  
quels ledit Merignac, s'est auisé de faire pouruoir ledit  
Machon de ladite Preuosté, & de faire reuiure par son moyen  
le mesme conflict qui a esté iugé par ledit Arrest contradi-  
ctoire. En effect, il fit signifier audit Guisenet le Lundy 25.  
Iuin 1663. sur le moment que la cause s'appelloit audit grand  
Conseil, des lettres en Reglement de Iuges d'entre lesdites  
Cours, mais ledit Guisenet ayant fait connoistre au Conseil  
la vexation dudit Merignac, il y obtint Arrest le 26. Iuin 1663.  
par lequel il fit leuer les deffenses portées par lesdites lettres.

Pour éluder cét Arrest, Merignac obtint Arrest sous le  
nom dudit Machon le 3. Iuillet ensuiuant aux fins du mesme  
Reglement de Iuges, & depuis s'estant voulu luy-mesme  
puruoir contre l'Arrest du 26. Iuin il seroit interuenu Arrest  
contradictoire le 11. Iuillet, entre lesdits Guisenet & Meri-  
gnac, sur leurs Requestes respectiues par lequel les parties  
furent renuoyées au grand Conseil, sans que l'Arrest qui in-  
teruiendroit audit grand Conseil püst nuire ny preiudicier  
audit Machon, avec lequel ledit Reglement de Iuges ayant  
esté pourfuiuy, & ledit Merignac estant rentré en cause par  
vne procedure extraordinaire, il s'est encore vne fois laissé  
iuger par forclusion, & fait ensuitte restituer.

Il faut remarquer que ledit Machon duquel Merignac se  
sert n'a iamais esté receu partie au procez, n'a fait paroistre  
aucun tiltre, & consequemment n'estant point partie receuë  
au procez, n'a pas pû & n'est pas receuable à former aucun  
conflict de Iurisdiction.

Il s'agit donc de sçauoir si les parties seront renuoyées au  
Parlement de Bordeaux ou au grand Conseil, c'est à dire,

qu'il s'agit d'une chose jugée par deux Arrests de forclusion, deux Arrests contradictoires, & un Arrest sur Requête rendu en grande connoissance de cause; toutes les parties & Merignac particulierement ont procedé volontairement au grand Conseil, & y doiuent encore estre renuoyées; il s'agit de prouuer la garde du corps du dernier titulaire, & par une declaration expresse de sa Majesté, la connoissance des recellemens de corps des Beneficiers est attribuée audit grand Conseil; de plus frere Iean Turquier l'un des pretendans audit Benefice est de l'Ordre de Clugny, dont les causes sont renuoyées audit grand Conseil; outre que ledit Merignac à plus de parens au degré de l'Ordonnance qu'il n'en faut pour euoquer du Parlement de Bordeaux. Il n'y a donc aucune difficulté que les parties soient renuoyées au grand Conseil, & ledit Merignac condamné aux despens.

*Monsieur BENARD DE REZE, Rapporteur.*

A D A M Aduocat.

